

《大方廣圓覺修多羅了義經導讀》補充講表

◎附表十四（以下糅合諦閑大師《圓覺經講義附親聞記》）

○四緣假合，妄有六根；六根、四大，中外合成……畢竟無有緣心可見。

◆四緣：指見、聞、覺、知之四性皆有能緣義故。以四性和合，妄有根相。

◆見、聞、覺、知四緣，能緣色、聲、香、味、觸、有此能緣之性，故有六根。虛妄而有能緣之氣分，此氣分由四大而得，入於六根之中，積聚而有緣相。

◆六根：見為眼根，聞為耳根，覺為鼻舌身之三根，以三根皆合而方知，故總名為覺，知為意根，此先有六根也。因有六根，復對外之四大，故稱六根四大。然內之四性，既可分為六根，外之四大，亦可分為六塵，此次有六塵也。中即是內，合成者，謂內根外塵，合成十二處也。

◆緣氣：指六識緣影。緣影雖妄，居然有六識之氣分，故曰緣氣，於中積聚，謂於內外根塵之中，積聚不散，此後有六識也。似有能緣之相，既稱似有，安得為真？故云假名為心。然根塵識三，雖同妄有。而起惑造業，惟六識之力最強。急欲令其觀識虛妄，至重呼以告之，俾留意也。

◆此虛妄心，即指六處識心。托塵似現，故曰：無塵不有。即彼外之六塵，亦是四大假合，若四大分解，則無塵可得。據此則於根塵識中，能緣之根，所緣之塵，各歸散滅。內外不成，中云何立，故云：畢竟無有緣心可見。畢竟：決定義，謂到底無有也。

○善男子！彼之眾生幻身滅故，幻心亦滅……幻滅亦滅；幻滅滅故，非幻不滅。

◆彼眾生，指求圓覺之人。求淨圓覺，須先觀身如幻。如幻之境能住持，則幻身自滅。幻身滅故能住持，則幻心亦滅。以心依於身，身滅則心無所依故。幻心滅故能住持，則幻塵亦滅。以塵托心現，心滅則塵無所托故。幻塵滅故能住持，則幻滅亦滅。以為滅塵故，

立幻滅名。塵既已滅，幻滅無所用故。幻滅滅，故能住持，則是法法皆真，故曰：非幻。非幻則體無終窮，故不滅也。

◆奢摩他一觀到底，方知身是幻，心是垢，幻滅而非幻現前，乃不滅也。

○譬如磨鏡，垢盡明現。

◆求淨圓覺，如磨鏡然。幻身，幻心，幻塵，幻滅，重重蓋覆，不是淨圓覺心，皆如鏡上之垢。身滅心滅，乃至幻滅亦滅，如鏡垢磨盡，非幻即覺心也。如鏡之本明，全體俱現。

○善男子！當知身心，皆為幻垢，垢相永滅，十方清淨。

◆不了身心如幻，執我、執法，蓋覆淨圓覺心，故云：皆為幻垢。垢相：指身心塵滅四重。必至盡滅，方為永滅。如是則法法皆真，故云：十方清淨。此約義而合也。

○善男子！譬如清淨摩尼寶珠，映於五色，隨方各現，諸愚癡者，見彼摩尼實有五色。

◆清淨摩尼寶珠：此珠龍王髻中所有。清淨：言其體內外明徹，無垢染故。摩尼：言其用，此云：如意，能雨寶故。寶珠言其相，非尋常物，珠中寶故。忤是影現，對彼外之五色，影現於內，故云忤於五色。喻如淨圓覺心，對眾生外之五陰身心，影現心內。隨方各現者，何方有五色，即於何方影現。喻眾生何類中有五陰身心，即隨何類影現，如形影相肖也。世人不知是影，名為愚癡。喻眾生不達是幻，名為凡小。以凡夫愚我，小乘愚法，同一愚也。影元無實，由世間不知是影，遂見五色。喻幻元非真，由凡小不了是幻，遂執真有五陰。執我執法，即其相也。

○圓覺淨性，現於身心，隨類各應，彼愚癡者說淨圓覺，實有如是身心自相，亦復如是。

◆圓覺淨性，合摩尼寶珠。現於身心，合忤於五色。隨類各應，合隨方各現。迷影迷幻，義亦相似，故皆以愚癡名之。說淨圓覺，實有自相，合摩尼實有五色。法喻義同，故云：

亦復如是。

◆圓覺淨性是體，即圓成實性，乃實有者。現於身心是用，即依他如幻。遇淨緣即應四聖，遇染緣即應六凡，故曰：隨類各應。實有如是身心自相，為遍計執性，乃本空者。

○由此不能遠於幻化。

◆謂由此執身心為實有，於中諍人競我，計是較非，所以不能遠於幻化。既不能遠，自應常在其中。惑業苦三，如惡叉聚，輪轉往復，染污覺心，成深垢也。

○是故我說身心幻垢，對離幻垢：垢盡對除，即無對垢及說名者。

◆是故二字，承上不能遠離而言。所以不能遠離，由於不知身心是個幻垢。以是之故，我說身心是幻是垢。若能知得是身如幻者，應當遠離。知心是垢者，設法對治。對即對治心垢，離即遠離身幻也。果能對離幻垢，佛說是人名為菩薩，非尋常人比也。垢盡者，

不肯得少為足，必至究竟淨盡。垢既淨盡，則對治亦無所用矣，故曰：對除。垢盡對除，即無對垢之人，人既不有，名將安立，故云：即無對垢及說名者。至此，豈非全體淨覺妙心耶？故科名「垢盡還淨」。

◆不能離垢，是六凡眾生。能離垢，是菩薩。垢盡對除，即如來。即無對垢及說名者，即淨圓覺性。絕對無待，即佛之名字，亦用不著。

○此菩薩及末世眾生，證得諸幻滅影像故，爾時便得無方清淨。無邊虛空，覺所顯發。

◆菩薩眾生，均是求圓覺人也。證得諸幻滅影像者，謂一切諸法，本屬幻有，元是淨心影像，今以得正住持故，一得永得，再不至為影像所搖，故云：證得。

◆爾時：即證得之時，影像既滅，淨覺畢露，故云便得清淨。無方：即周遍。無邊虛空，向因無明幻垢，障蔽淨圓，而成頑虛。今證得幻滅障除，覺性顯發，則無邊虛空，轉成無際淨圓。如《楞嚴經》云：『一人發真歸元，十方虛空，皆悉銷殞』。